



EEU

სახელმწიფოსა და სამართლის სამეცნიერო-კვლევითი ცენტრის
დებულება

დამტკიცებულია წარმომადგენლობითი საბჭოს 2023
წლის 15 ნოემბრის N06 დადგენილებით

თავი I. ზოგადი დებულებები

მუხლი 1. ზოგადი დებულებები

- 1.1. წინამდებარე დებულება განსაზღვრავს შპს „აღმოსავლეთ ევროპის უნივერსიტეტის“ (შემდგომში – უნივერსიტეტი) კვლევითი ერთეულის – სახელმწიფოსა და სამართლის სამეცნიერო-კვლევითი ცენტრის (შემდგომში – ცენტრი) სამართლებრივ სტატუსს, საქმიანობის მიზნებს, უფლებამოსილებას, ფუნქციებს, მართვას, სტრუქტურასა და ცენტრის საქმიანობასთან დაკავშირებულ სხვა საკითხებს.
- 1.2. ცენტრი წარმოადგენს უნივერსიტეტის სტრუქტურაში შემავალ კვლევით ერთეულს, რომელიც თავის საქმიანობას წარმართავს საქართველოს საკანონმდებლო და კანონქვემდებარე სამართლებრივი აქტების, წინამდებარე დებულების, უნივერსიტეტის დებულებისა და სხვა შიდა სამართლებრივი აქტების შესაბამისად.
- 1.3. ცენტრი ანგარიშვალდებულია უნივერსიტეტის რექტორისა და სამეცნიერო საკითხებში ვიცე-რექტორის წინაშე.

თავი II. ცენტრის საქმიანობის მიზნები, უფლებამოსილება და ფუნქციები

მუხლი 2. ცენტრის საქმიანობის მიზნები

- 2.1. ცენტრის საქმიანობის მიზნებია:
 - ა) საჯარო მმართველობის, სახელმწიფო მოწყობის თეორიისა და პრაქტიკის, საუკეთესო გამოცდილების კვლევა;
 - ბ) სამართლისა და მმართველობის პრობლემური საკითხების კვლევა, ადამიანის უფლებების დაცვისა და დემოკრატიული მმართველობის განვითარების გამოცდილების გაანალიზება;
 - გ) სახელმწიფოსა და მოქალაქის სამართლებრივი ურთიერთობების და სამოქალაქო ურთიერთობების სამართლებრივი მოწესრიგების აქტუალური საკითხების კვლევა;
 - დ) ინოვაციური საგანმანათლებლო და სამეცნიერო გარემოს ფორმირებისათვის საუკეთესო გამოცდილებათა კვლევა და მათი ინტეგრირება საგანმანათლებლო სისტემებში;
 - ე) კვლევის შედეგების განზოგადება და წინადადებების შემუშავება საქართველოს კანონმდებლობისა და სხვადასხვა რეგულაციების სრულყოფის მიზნით.

მუხლი 3. ცენტრის ფუნქციები და ამოცანები

3.1. ცენტრის ფუნქციები და ამოცანებია:

- ა) კვლევის პროცესში დოქტორანტებისა და პრაქტიკოსი მკვლევარების ჩართვა;
- ბ) კვლევის შედეგების ხელმისაწვდომობა სხვადასხვა უნივერსიტეტის სტუდენტებისათვის;
- გ) კვლევის შედეგების სასწავლო დისციპლინებში ასახვა და დანერგვა.

მუხლი 4. ცენტრის უფლებამოსილება

4.1. დაკისრებული ფუნქციებისა და ამოცანების სრულფასოვნად შესრულების მიზნით ცენტრი უფლებამოსილია:

- ა) ცენტრის სახელით ითანამშრომლოს სახელმწიფო/ადგილობრივი თვითმმართველობის ორგანოებთან, არასამთავრობო ორგანიზაციებთან და კვლევით დაწესებულებებთან;
- ბ) ცენტრის სახელით ითანამშრომლოს ადგილობრივ, უცხოურ და საერთაშორისო აკადემიურ, სამეცნიერო-კვლევით და სხვა პროფილის დაწესებულებებთან;
- გ) ცენტრის სახელით ითანამშრომლოს უცხოეთის სასწავლო-კვლევით დაწესებულებებთან და მონაწილეობა მიიღოს ეროვნულ და საერთაშორისო სამეცნიერო გრანტების პროექტებში;
- დ) პერიოდულად ჩაატაროს საერთაშორისო და ეროვნული კონფერენციები, სემინარები და ფორუმები, რომელიც ხელს შეუწყობს ინსტიტუტის კვლევების შედეგების წარმოჩენას;
- ე) გამოსცეს სამეცნიერო ჟურნალები და სასწავლო ლიტერატურა.
- ვ) მიმართოს უნივერსიტეტის სტრუქტურაში შემავალ ერთეულებსა და თანამშრომლებს და გამოითხოვოს მათგან ინფორმაცია უნივერსიტეტში დადგენილი წესის შესაბამისად;
- ზ) ისარგებლოს უნივერსიტეტის ინფრასტრუქტურით, ინვენტარითა და სხვა ქონებით უნივერსიტეტში დადგენილი წესის შესაბამისად;
- თ) განახორციელოს სამეცნიერო-კვლევით საქმიანობასთან დაკავშირებული დამხმარე საქმიანობა;
- ი) მოითხოვოს უნივერსიტეტის ბიუჯეტიდან სახსრების გამოყოფა;
- კ) განახორციელოს მოქმედი კანონმდებლობითა და უნივერსიტეტის შიდა სამართლებრივი აქტებით მინიჭებული სხვა უფლებამოსილებები.

თავი III. ცენტრის მართვა, სტრუქტურა და პერსონალი

მუხლი 5. ცენტრის მართვა

- 5.1. ცენტრის საქმიანობას წარმართავს ხელმძღვანელი, რომელსაც თანამდებობაზე ნიშნავს და ათავისუფლებს უნივერსიტეტის რექტორი.
- 5.2. ცენტრის ხელმძღვანელი ანგარიშვალდებულია უნივერსიტეტის რექტორისა და სამეცნიერო საკითხებში ვიცე-რექტორის წინაშე.
- 5.3. ცენტრის ხელმძღვანელის დროებით არყოფნის ან პოზიციაზე ვაკანსიის არსებობის შემთხვევაში მის მოვალეობას ასრულებს ვიცე-რექტორი სამეცნიერო საკითხებში ან უნივერსიტეტის რექტორი იღებს გადაწყვეტილებას მოვალეობის შემსრულებლის დანიშვნის შესახებ.

მუხლი 6. ცენტრის სტრუქტურა და პერსონალი

- 6.1. ცენტრის შემადგენლობაში შედიან მკვლევარები, რომლებსაც თანამდებობაზე ნიშნავს და ათავისუფლებს უნივერსიტეტის რექტორი.
- 6.2. ცენტრის სრულფასოვანი ფუნქციონირებისთვის შესაძლებელია მის შემადგენლობაში ხელშეკრულების საფუძველზე მოწვეულ იქნენ შესაბამისი კომპეტენციისა და რაოდენობის სპეციალისტები და დამხმარე პერსონალი.
- 6.3. ცენტრის თანამშრომლები ანგარიშვალდებულნი არიან ცენტრის ხელმძღვანელის წინაშე.
- 6.4. ცენტრის თანამშრომელთა ფუნქცია-მოვალეობები განსაზღვრულია მათთან გაფორმებული შრომითი ხელშეკრულებით.

მუხლი 7. ცენტრის ხელმძღვანელის ფუნქცია-მოვალეობები

7.1. ცენტრის ხელმძღვანელი:

- ა) ხელმძღვანელობს და წარმართავს ცენტრის საქმიანობას;
- ბ) პასუხისმგებელია ცენტრის ფუნქციებისა და ამოცანების შესრულებაზე;
- გ) ანაწილებს ფუნქციებს ცენტრის თანამშრომლებს შორის, აძლევს მათ შესაბამის მითითებებსა და დავალებებს;
- დ) აკონტროლებს ცენტრის თანამშრომელთა მიერ ფუნქციებისა და დავალებების შესრულებას;
- ე) ისმენს ანგარიშს თანამშრომლებისგან მათ მიერ შესრულებული სამუშაოს შესახებ;
- ვ) საკუთარი კომპეტენციის ფარგლებში ხელს აწერს/ავიზებს ცენტრში მომზადებულ დოკუმენტებს;
- ზ) ანაწილებს ცენტრში შემოსულ კორესპონდენციას;

- თ) ცენტრის საქმიანობის შესახებ ანგარიშს წარუდგენს ვიცე-რექტორს სამეცნიერო საკითხებში (ასევე მოთხოვნის შემთხვევაში – რექტორს) არანაკლებ წელიწადში ერთხელ, აკადემიური წლის ბოლოს და/ან მოთხოვნისამებრ;
- ი) ვიცე-რექტორს სამეცნიერო საკითხებში (ასევე საჭიროების შემთხვევაში – რექტორს) წარუდგენს წინადადებებს ცენტრის სტრუქტურის, შტატების, მუშაობის ორგანიზაციის, თანამშრომელთა წახალისების ან დისციპლინური პასუხისმგებლობის დაკისრების შესახებ;
- კ) შუამდგომლობს ცენტრის თანამშრომელთა კვალიფიკაციის ამაღლებისა და გადამზადების თაობაზე;
- ლ) თავისი კომპეტენციის ფარგლებში ცენტრის სახელით გასცემს დასკვნებს;
- მ) მინიჭებული უფლებამოსილების ფარგლებში წარმოადგენს ცენტრს მესამე პირებთან ურთიერთობაში;
- ნ) ახორციელებს მოქმედი კანონმდებლობითა და უნივერსიტეტის შიდა სამართლებრივი აქტებით მინიჭებულ სხვა უფლებამოსილებებს.

თავი IV. ცენტრის ქონება და ფინანსები

მუხლი 8. ცენტრის ქონება

- 8.1. ცენტრს, მასზე დაკისრებული ფუნქციებისა და ამოცანების შესრულების მიზნით, შესაძლებელია უნივერსიტეტისგან სარგებლობაში გადაეცეს უძრავ-მოძრავი ქონება, ინვენტარი და სხვა მატერიალურ-ტექნიკური საშუალებები, რომელიც წარმოადგენს უნივერსიტეტის საკუთრებას.
- 8.2. ცენტრის საქმიანობის შედეგად შექმნილი ინტელექტუალური და მატერიალური ფასეულობები წარმოადგენს უნივერსიტეტის საკუთრებას.

მუხლი 9. ცენტრის დაფინანსება

- 9.1. ცენტრის დაფინანსების წყაროებია:

- ა) უნივერსიტეტის ბიუჯეტი;
- ბ) სამეცნიერო გრანტები;
- გ) კვლევის შედეგებისა და სხვა სახის სამეცნიერო-კვლევითი საქმიანობის კომერციალიზაციით მიღებული შემოსავლები;
- დ) დახმარებები და შემოწირულობები;

ე) საქართველოს კანონმდებლობითა და უნივერსიტეტის შიდა სამართლებრივი აქტებით დაშვებული სხვა შემოსავლები.

9.2. ცენტრის მიერ მიღებული სახსრები და სხვა შემოსავლები მთლიანად ხმარდება ცენტრის მიზნებისა და ფუნქციების შესრულებას და დაუშვებელია მათი სხვა მიზნით გამოყენება.

თავი V. დასკვნითი დებულებები

მუხლი 10. ცენტრის რეორგანიზაცია და ლიკვიდაცია

10.1. ცენტრის რეორგანიზაცია და ლიკვიდაცია ხდება უნივერსიტეტის შიდა სამართლებრივი აქტებით დადგენილი წესის შესაბამისად.

მუხლი 11. დებულების დამტკიცება, ცვლილებების შეტანა, ძალადაკარგულად გამოცხადება

11.1. წინამდებარე დებულებას ამტკიცებს უნივერსიტეტის რექტორი წარმომადგენლობითი საბჭოს წარდგინების საფუძველზე.

11.2. წინამდებარე დებულებაში ცვლილებები შეაქვს და მას ძალადაკარგულად აცხადებს უნივერსიტეტის რექტორი წარმომადგენლობითი საბჭოს წარდგინების საფუძველზე.